

“PuntuEus” FUNDAZIOAREN ESTATUTUAK
(FUNDAZIOA EUSKAL AUTONOMIA ERKIDEGOKOA DA)

I. TITULUA.- XEDAPEN OROKORRAK

1. artikulua.- Izena.

1.- Euskal Autonomia Erkidegoko “PuntuEus” izeneko Fundazioa, PuntuEus Elkarteak eginda, bere ondarea interes orokorreko helburuetara lotuta modu iraunkorrean duen irabazi-asmorik gabeko erakunde kultural eta soziala da.

2.- Fundazioa bere fundatzaileen borondatearen eta estatutu hauen arabera arautzen da, eta, betiere, ekainaren 2ko 9/2016 Legearen eta hura garatzen duten erregelamendu bidezko xedapenen eta indarrean dauden gainerako arauen arabera.

3.- Fundazioaren iraupena mugagabea da.

2. artikulua.- Araubidea, gaitasuna eta nortasun juridikoa.

1.- Fundazioak nortasun juridiko propioa eta independentea du, eraketa-eskritura Fundazioen Erregistroan inskribatzen denetik aurrera. Halaber, gaitasun juridiko eta jarduteko gaitasun erabatekoa izango du, muga hauekin soilik: sortzaileak bere borondatez fundazioa osatzen duen ekitaldian adierazitakoak, estatutu hauetan ezarritakoak, eta, betiere, aplikatzekoak diren lege xedapenetan eta bereziki ekainaren 2ko 9/2016 Legean, Euskal Autonomia Erkidegoko Fundazioei buruzkoan, jasotakoak.

2.- Horrenbestez, eta Babesletzari egin beharreko komunikazioak eragotzi gabe, Fundazioak jarduteko erabateko gaitasuna izango du bere helburuak betetzeko, Kode Zibilaren 38. artikuluan ezarritakoaren arabera. Fundazioak ondoren azaltzen den guztia egin ahalko du:

a) Mota guztietako jarduera ekonomikoak garatu, elkartearen helburuak lortze aldera edo helburuok lortzeko baliabideak batze aldera.

b) Mota guztietako ondasunak eta eskubideak bereganatu eta besterendu, edozein tituluren bidez, eta mota guztietako egintzak, negozioak eta kontratuak egin.

c) Edozein motatako akzioak baliatu, bere estatutuen eta legeen arabera.

3. artikulua.- Fundazioaren helburuak.

1.- Fundazioaren helburu orokorra Interneten euskara eta euskal kultura sustatzea da.

Horretarako, Fundazioaren helburu zehatzak honakoak dira: “.eus” edo antzeko Interneteko domeinua eskatzeko beharrezkoak diren dokumentu eta eskakizun guztiak betetzea eta, behin onartuta, ICANN erakundearekin kontratua sinatzea, zeinaren bitartez, irabazi-asmorik gabeko PuntuEus Fundazioa eskatutako domeinuaren kudeaketa, kontrol eta administrazioaren arduraduna bilakatuko den.

Interneteko domeinu horren ardura izateak suposatzen du: domeinuen erregistrarako eskariak jasotzea; domeinua erabiltzeko ezinbestekoak diren baldintzak betetzen direla

ziurtatzea; betetzen baditu, erregistrarako baimena ematea; eta, azkenik, erregistroa teknikoki mantentzen dela ziurtatzea.

Fundazioaren lana ezinbestekoa da ".eus" edo antzeko domeinu hori, Interneten euskara eta euskal kultura sustatzeko tresna bat izan dadin, bere jaiotzatik eta martxan mantentzen den bitartean. Alegia, Fundazioaren egiteko nagusia euskara eta euskal kulturaren sustapena ziurtatzea da, horretarako domeinuaren iraunkortasuna bermatuko duen kudeaketa eta kontrolaren arduradun izango delarik.

Era berean, PuntuEus Fundazioa irabazi-asmorik gabekoa denez, kudeaketa eta kontrol horren helburu bakarra domeinuaren iraunkortasuna bermatzea da, horrela soilik bilakatuko baita euskara eta euskal kulturaren sustapenerako tresna. Eta hori horrela, domeinuaren hedapenaren arabera, kudeaketa-planak aldatu egingo dira, Fundazioaren helburua domeinuaren iraunkortasunari hertsiki eta soilik lotuz, inongo irabazi-asmorik gabe.

2.- Fundazioaren xedeari dagozkion jarduerak egoki deritzon eran burutu ahal izango ditu Fundazioak, beste zenbait entitate edo erakundetan parte hartuz ere; horretarako muga bakarrak izango dira legean ezarritakoak eta sortze-gutunean edo estatutu hauetan jasotako aginduek ondoriozta ditzaketenak.

Horrela, Fundazioak bere helburuen garapena honako era hauetan burutu ahal izango du, legeak ezartzen dituen mugen barruan betiere:

- a) Fundazioak berak zuzenean, bere organoen bidez, Patronatuak aldizka prestatu eta onartu behar duen jarduera-egitasmoa gauzatuz.
- b) Zeharka, beste zenbait entitate, elkarte eta erakundetan parte hartuz.
- d) Legeak baimentzen dituen gainerako fundazio, elkarte, kooperatiba, sozietate edo beste edozein izaeratako erakundeak sortuz edo sortzen lagunduz.
- e) Fundazioaren helburuak betetzeko baliagarri izan daitezkeen gainerako erakunde edo pertsona juridiko edo fisikoen jardueretan parte hartuz, bereziki Fundazioaren inguruneak direnean.
- f) Xede hauek lortzeko asmoarekin, Fundazioak laguntza ekonomikoa, aholkularitza eta lankidetzak profesionala eskaini edo eman ahal izango ditu. Era berean, haren helburuak bete ahal izateko, legatu, dohaintza eta diru-laguntzak ematea sustatuko du.

4. artikulua.- Helbidea eta lurralde-eremua.

1.- Hona Fundazioaren helbidea: Arriola pasealekua 2, Donostia, Gipuzkoa.

2.- Fundazioaren Patronatuak estatutuak aldatzeko hartutako erabaki baten bidez aldatu ahalko da helbide hori, eta erabaki hori Fundazioen Erregistroan inskribatu beharko da. Halaber, Patronatuari ahalmena ematen zaio establezimenduen, ordezkaritzen edo bulegoen egoitzak hautatzeko, kasuan kasuko fundazioaren helburuak betetzeko eginkizunean sortzen diren beharrianen arabera.

3- Lurralde-eremu honetan garatuko ditu batez ere Fundazioak bere jarduerak: Euskal Autonomia Erkidegoan.

5. artikulua.- Onuradunak.

Orotariko pertsona fisiko nahiz juridikoak izan daitezke Fundazioaren onuradun, inolako bereizkeriarik gabe, beti ere interneten aktibitatearen bat burutzen badu eta aktibitate horrek fundazioaren xedeei erantzuten badie.

Fundazioak, bere onuradunei emandako zerbitzuen truk, zenbateko bat ordaintzea galdatzen dienean, zenbateko horren ordainketa edo abonua egitearren bakarrik zehaztuko ditu Fundazioak onuradunak.

2.- Onuradun zehatzak izendatzeko, kontu hauek izango ditu aintzat Patronatuak:

- a) Fundazioaren jarduerak pertsona fisikoek nahiz juridikoek osatutako kolektibo orokorreki ekarri behar die onura. Onuraduntzat hartuko dira enpresa bateko edo batzuetako langileek eta horien senitartekoek osatutako kolektiboak. Nolanahi ere, onuradunak aukeratzeko irizpideek objektiboak eta inpartzialak behar dute izan.
- b) Ezin izango da Fundazioaren helburu nagusia izan haren prestazioak eskaintzea hauei guztiei: fundatzaileei edo Patronatuko kideei, haien ezkontideei edo haiekin antzeko harreman afektiboa dutenei edo haien laugarren gradura bitarteko senideei (laugarrena barne), ez eta interes orokorra ez duten pertsona juridiko bereiziei ere.
- c) Nolanahi ere, inork ere ezin izango du alegatu, ez bakarka ez taldeka, Fundazioaren edo Patronatuaren aurrean, onura horiek eman baino lehen baliatzeko aukera, ezta pertsona jakin batzuei emanarazi ere.

3.- Fundazioak eskainitako zerbitzuen izaera dela eta, onuradunen kopurua mugatu beharra dagoenean, Fundazioaren Patronatuak hautatu eta zehaztuko ditu horiek, eta ez da atzera egiterik izango erabaki horretan. Horretarako, hautagai bakoitzaren meritu, premia, gaitasun ekonomiko eta aprobetxamendurako aukera desberdinak nahiz bestelako ezaugarri objektiboak balioetsiko dira hautaketa egiteko unean.

6. artikulua.- Jarduera- eta funtzionamendu-printzipioak.

Fundazioak printzipio hauek beteko ditu bere jardueran:

- a) Publikotasuna eta gardentasuna. Fundazioaren xede eta jarduerari buruzko informazio nahikoa emango du, herritarrek oro har eta behin-behineko onuradunek haien berri izan dezaten.
- b) Inpartzialtasuna eta bereizkeriarik eza pertsona onuradunak zehazterakoan, baita jarduerak eta prestazioak zehazterakoan ere.
- c) Jarduteko jarraibideen sustapena. Horretarako, jokabide-kodeak eta jardunbide egokien kodeak sortuko ditu.
- d) Patronatuko kideen zerbitzu-espirtuaren sustapena, bai eta fundazioaren interesak norberaren interesen aldean lehenesteko espirtuarena ere.
- e) Etengabeko lankidetzaren leiala Euskal Autonomia Erkidegoko Fundazioen Babesleztarekin.
- f) Ondarea eta errentak fundazioaren xedeetarako benetan erabiltzen delako defentsa eta zaintza, Fundazioaren estatutuetan eta indarrean dagoen legedian aurreikusitakoarekin bat etorrira.
- g) Genero-berdintasuna.

II. TITULUA.- PATRONATUA

7. artikulua.- Fundazioaren Patronatua.

Patronatua fundazioaren gobernu- eta ordezkaritza-organoa da. Patronatuari egokituko zaio fundazioaren helburuak betetzea, fundazioaren ondarea osatzen duten ondasun eta eskubideak arduraz administratzea, bai eta haien errendimendua eta erabilgarritasuna segurtatzea ere.

8. artikulua.- Patronatuaren osaera.

1.- Patronatuak gutxienez hiru kide izango ditu, eta gehienez hamabost kide.

2.- Pertsona fisikoak zein juridikoak izan ahalko dira patronatukideak. Patronatua osatzen duten pertsona fisikoek jarduteko gaitasun osoa izan beharko dute, eta ezin izango dute desgaituta egon kargu publikoak betetzeko. Patronatukideak diren pertsona juridikoek izendatu beharko dituzte organo horretan haien ordezkari izango diren pertsona fisikoak.

3.- Hauek izango dira patronatukideak:

- Lehendakaria.
- Idazkaria.
- Diruzaina.
- Beste patronoak: hamabi kide gehienez.

4.- PuntuEus Elkartea eta Euskaltzaindia berezko patronoak izango dira, eta modu iraunkorrean kide bana izango dute Patronatuan.

9. artikulua.- Patronatuko kideen izendapena eta kargu-uztea.

1.- Fundazioaren sortzaileak izendatuko du, eraketa-eskrituran, lehenengo Patronatua.

2.- Patronatukide berriak izendatu behar direnean, kide gehiago izango direlako edo kideren bat ordezkatu behar delako, Patronatuak izendatuko ditu. Horretarako, kideen hiru laurdenen aldeko botoa beharko da gutxienez.

3.- Patronatuak hiru hilabeteko epean eman beharko dio bere kideen izendapenaren eta kargua utzi izanaren berri Euskal Autonomia Erkidegoko Fundazioen Erregistroari, izendatze- edo kargu uzte- akordioak hartzen diren egunetik zenbatzen hasita.

4.- Patronatukideek espresuki onartu beharko dute beren izendapena Euskal Autonomia Erkidegoko Fundazioei buruzko Legearen 16. artikuluan aurreikusitako moduren baten arabera. Karguari uko egiten badiote, aipatu artikulua 2. atalean aurreikusitako moduren batean egin beharko dute.

5.- Patronatukideen karguak baliogabetzea erabaki ahal izango du organo judizial eskudunak, erantzukizunezko jardunbidea abian jarri bada haien aurka legeak aurreikusitako prestasunez ez betetzeagatik.

6.- Fundazioen Erregistroan inskribatuko dira gobernuko organoko kideen izendapena eta kargua utzi izana.

10. artikulua.- Patronatukideen kargu uztearen arrazoiak.

1.- Patronatukideek kasu hauetan utziko diote patronatukide izateari:

- a) Hiltzen direnean edo hil egin direla deklaritzen denean, eta pertsona juridikoa azkentzen denean.
- b) Legeak ezarritakoaren arabera, ezgaitasun-, desgaitasun- edo bateraezintasun-egoeraren batean gertatzen denean.
- c) Patronatukide izatera eraman zuten kargua betetzeari uzten diotenean.
- d) Kargua ordezkari leial batek berez behar duen arduraz betetzen ez dutenean, baldin eta ebazpen judizialez adierazten bada ez dutela hala bete.
- e) Ebazpen judizialez erantzukizun-akzioa onartzen denean.
- f) Agintaldia amaitzen zaienean, baldin eta aldi jakin baterako izendatu bazituzten.
- g) Karguari uko egiten diotenean.

11. artikulua.- Patronatukideak ordezteak.

1.- Patronatukideen ordezkapena Fundazioen Erregistroan une horretan erregistratuta dagoen patronatuak erabakiko du. Patrono berriak izendatzeko Estatutu hauetan aurreikusi den prozedura eta gehiengoaren arabera erabakiko da patronatukideen ordezteak, eta ordeztu nahi den patronoak ezingo du erabakian parte hartu.

2.- Ezin direnean patronatukideak aipatuko eran ordeztu, Fundazioaren Legeari aurreikusitako estatutu-aldaketara joko da, eta Euskal Autonomia Erkidegoko Fundazioen Babesletzak ahalmena izango du Fundazioa gobernatu eta ordezkatzeko duen organoa behin-behinean –hau da, estatutuak aldatu arte– osatzeko duten kideak izendatzeko (kasu batzuetan, kide bakarra izan ahalko da).

3.- Uneren batean patronatukideak hiru baino gutxiago badira, gainerako patronatukideek (beti ere haien kargua indarrean dagoela), edo fundatzaileek, hala badagokio, behar adina kide izendatu ahal izango dituzte legeak eskatzen duen gutxienerako kopurura iristeko, eta 30 eguneko epea izango dute izendapen horiek Babesletzari horren berri emateko.

4.- Fundazioko patronatukideen ordezkapenak Euskal Autonomia Erkidegoko Fundazioen Erregistroan inskribatuko dira.

12. artikulua.- Patronatuaren iraupena.

1.- Patronatukideen karguen iraupena lau urtekoa izango da; dena den, patronatuko kideak berriro ere hautatuak izan daitezke epe berberako eta modu mugagabe batez.

2.- PuntuEus Elkartea eta Euskaltzaindia patronatuko kide izango dira modu iraunkorrean eta euren iraupena, patrono gisa, mugagabekoa izango da.

3.- Lehendakari, idazkari eta diruzain kargua lau urtean behin aldatuko da patronatu kideen artean; hauek ere berriz hautatuak izan daitezke, kideen botoen hiru laurdenarekin.

4.- Heriotza, ezintasuna, desgaitasuna, heriotza-adierazpena, baztertzea edo bateraezintasuna, aginte-epearen bukaera, ukoa, lekualdatzea edo gobernu-organoko kide baten ordezkatzeta nahiz kargu-uztea edo beste edozein gorabehera dela-eta, bete gabe geratzen diren diren postuak Patronatuak beteko ditu. Kargu bat ezin izango da egon 6 hilabetetik gora bete gabe.

13. artikulua-- Patronatukide-karguaren doakotasuna.

1.- Fundazioetako patronatukideek doan jardungo dute beren karguan. Dena den, eginkizun horiei lotuta dituzten gastuen zenbatekoa itzuli egingo zaie, behar bezala justifikatuz gero.

2.- Beren eginkizunei dagozkien zerbitzuez gainera Fundazioan beste zerbitzu batzuk ematen dituzten patronatukideei ordainsari bat ematea erabaki dezake Patronatuak. Erabaki hori Babesletzak baimendu egin beharko du, hiru hilabeteko epean.

14. artikulua.- Fundazioko lehendakaria.

1.- Patronatuak lehendakari bat hautatuko du bere kideen artean, eta haren ardura izango da, bere ekimenez edo gutxienez kideen herenak hala eskatuta, Patronatua biltzeko deialdia egitea, eztabaidak bideratzea eta hartzen diren erabakiak betearaztea.

2.- Patronatuko lehendakaria gobernu organo horren kargu gorena izango da, eta, organo horretako kide izateak berezko dituen ahalmenak izateaz gain, Fundazioa ordezkatu beharko du Patronatuaren erabakietatik eratorritako ekitaldi eta kontratu guztietan eta Fundazioaren beste organoetan, eta baita aurkezten diren bestelako auzi, espediente, eta administrazio, epai, eta judizioz kanpoko gaietan ere. Horrez gain, prokuradore eta/edo abokatuei botere orokorrak emateko ahalmena du, azaldutako xedeari buruzko auzietarako.

15. artikulua.- Idazkaria.

Patronatuak idazkari bat izendatuko du, bere kideen artean edo kanpoko pertsonen artean. Idazkariaren ardura izango da Fundazioaren administrazio-lanak zuzentzea, dokumentazioa zaintzea eta Patronatuaren Akta Liburura transkribatzen diren bileren akta egitea, haiek onartuak izan eta lehendakariaren oniritzia jaso ondoren.

Idazkaria patronoa ez bada, Patronatuak ordainsari egokia ezarri ahal izango du kargu horri dagozkion eginkizunak betetzeagatik.

16. artikulua.- Diruzaina.

Patronatuak diruzain bat izendatuko du, bere kideen artean. Funtzio hauek izango ditu:

- a) Fundazioaren funtsak biltzea eta gordetzea.
- b) Sarreraren eta gastuen balantzea aurkeztea eta sinatzea.
- c) Inbentarioen, Kontuen, Jarduera Planaren eta Egunekeko Liburuak eramatea.

17. artikulua.- Fundazioaren zerbitzuko langileak.

1.- Kudeaketa orokorra gerentzia bati eskatu ahalko zaio, eta haren izendapena eta kargu uztea Babesletzari jakinarazi beharko zaio. Gerenteari emandako ahalorde orokorrak Euskal Autonomia Erkidegoko Fundazioen Erregistroan inskribatu beharko dira.

18. artikulua.- Patronatuaren eginkizunak.

Fundazioaren gobernuari eta administrazioari dagokion guztia Patronatuaren eginkizuna izango da, eta bereziki hau guztia:

- a) Fundazioaren orientazioa ezarri, haren helburuak ahalik eta hobekien bete daitezen.
- b) Ekonomia- eta finantza-baliabide guztiak administratu, haien jatorria edozein dela ere.
- c) Ontzat eman Inbentarioa, Egoera-Balantzea, Emaizten Kontua eta aurreko ekitaldiko Memoria, bai eta aldi horretako planaren likidazioa ere.
- d) Hurrengo ekitaldiko jarduera-plana onartu, bai eta hura azaltzen duen memoria ere.
- e) Egoki diren barne-erregimeneko arauak onartu.
- f) Batzorde delegatuak sortu, haien batzordekideak izendatu eta batzorde horiek izango dituzten ahalmenak zehaztu eta ahalorde orokorrak edo bereziak eman, hurrengo artikuluan xedatutakoaren arabera.
- g) Zuzendaritza-, betearazpen- eta aholkularitza-karguak izendatu, eta arlo teknikoan, administrazioan eta lan orokorretan behar diren gainerako langileak eta mendeak kontratatu.
- h) Fundazioaren helburuei begira hobekien egokituko diren egintza eta kontratu-mota oro formalizatu eta onartu, zeinahi ere den haien izaera: zibila, merkataritzakoa, lan-arlokoa, administrazioakoa eta abar.
- i) Erakunde eskudunen aurrean beharrezko proposamenak egin, maila goragoko erabakia beharko duten gaien kasuan.
- j) Enpresa, elkarte, erakunde edo partikularren partaidetza sustatu elkarlan teknikorako eta langile kualifikatuak trebatzeko programetan, funtsak emanez eta lankidetzak hitzarmenak sinatuz.
- k) Herentziak, legatuak edo dohaintzak onartu edo haiei uko egin, Fundazioarentzat komenigarria den guztietan; hori horrela, Babesletza jakinaren gainean jarriko da.

l) Fundazioaren estatutuak aldatu, fundazioaren sortzaileen borondatea hobeto betetzeko beharrezkoa bada.

19. artikulua.- Ahalmenak eskuordetzea eta ahalordeak ematea.

1.- Patronatuak bere ahalmenak eskuordetu ahalko ditu bere kideren batengan. Ezin izango da, inola ere, eskuordetu gai hauek erabakitzen dituzten akordioak:

a) Urteko kontuen onespina.

B) Jarduera-planaren onespina.

c) Estatutuen aldaketa.

d) Fundazioaren bat-egitea, bereiztea, eraldatzea, azkentzea eta likidatzea.

e) Beste pertsona juridiko baten eratze-egintzak, ez badaude erabat lotuta helburuei.

f) Beste pertsona juridiko batzuetako partaidetzak eskuratzeko edo saltzeko egintzak, baldin eta partaidetza horien zenbatekoa fundazioaren aktiboaren % 20 baino gehiago bada.

g) Fundazioaren aktiboaren % 20 gainditzen duten ondasunak edo eskubideak xedatzeko edozein egintza.

h) Zuzkidura handitzea edo gutxitzea.

i) Aktibo eta pasibo guztien edo haien parte baten bat-egitea, bereizketa edo lagapen orokorra.

j) Sozietateak edo beste pertsona juridiko batzuk desegiteko egintzak.

k) Patronatuko kideen autokontratazioa, salbu eta jarduketa hori errepikatua bada eta Babesletzak aurretik baimendu badu kasu berdinetarako.

l) Erantzukizunpeko adierazpenak onartzea eta formalizatzea.

2.- Orobat, Patronatuak ahalorde orokorrak eta bereziak eman eta errebokatzeko aukera izango du, kontu eta aurrekontuen onespina eta Babesletzaren baimena behar duten edo Fundazioaren kudeaketa arrunta gainditzen duten egintzei dagozkienak izan ezik.

20.- Batzorde betearazleak edo eskuordetuak.

1.- Patronatuak batera eta betirako eskuordetu ahalko ditu bere ahalmenak Patronatuko zenbait kideren alde, eta, horretarako, batzorde betearazle edo eskuordetu hauek sortu beharko ditu:

1) Komite Operatiboa: kideak patronatu-kideak izango dira nahitaez, gutxienez 3 kide eta gehienez 6 kide. Komite operatibo honen egitekoa Fundazioari dinamismoa ematea izango da eta, horretarako, erabakiak hartzeko eta eginbeharrak burutzeko autonomia izango du.

2) Aholkularitza Komitea: kideak patronatu-kideak edo kanpokoak izan daitezke. Aholkularitza komite honek ez du erabaki ahalmenik izango. Bere egitekoa ezagutzaren transmisioa eta aholkularitza izango dira.

21. artikulua.- Patronatuaren betebeharrak.

Fundazioko patronatukideek honako betebeharrak izango dituzte:

- a) Fundazioaren helburuak zorrotz betetzea eta betearaztea, legeak eta Fundazioaren estatutuek diotenari jarraikiz.
- b) Fundazioaren ondarea osatzen duten ondasunak eta eskubideak administratzea eta haien produktibitateari eustea, kudeatzaile on baten ekonomia- eta finantza-irizpideei jarraikiz.
- c) Kargua ordezkari leial baten prestasunaz betetzea.

22. artikulua.- Patronatukideen erantzukizuna.

1.- Patronatukideek solidarioki erantzungo dute Fundazioaren aurrean, legearen edo estatutuen kontrako egintzen ondorioz edo kargua eduki beharreko arduraz ez betetzeagatik eragiten dituzten kalteengatik eta galerengatik.

2.- Hauek guztiak erantzukizunetik aske geratuko dira: erabakiaren kontra bozkatu dutenak, erabakia hartzen eta betearazten parte hartu ez eta erabakiaren berririk ez zutela frogatzen dutenak, bai eta, erabakiaren berri izan arren, kaltea ekiditeko komeni zen guztia egin zutela edo gutxienez esanbidez aurka agertu zirela frogatzen dutenak ere.

23. artikulua.- Patronatuaren barneko funtzionamendua.

1.- Patronatuak bi bilera egingo ditu gutxienez, urtean. Urteko lehenengo sei hilabeteetan ezinbestez elkartuko da urteko kontuak onartzeko, bai eta hurrengo ekitaldiko Jarduera-Plana onartzeko ere.

2.- Patronatuaren deialdiak idatziz egin beharko dira, lehendakariak erabakitako gai-zerrenda jasota, eta gobernu-organoko kideen iradokizunak kontuan hartuta. Deialdiok bilera-eguna baino gutxienez hamar egun lehenago egin beharko dira, premiazko kasuetan izan ezik; horrelakoetan, epea 3 egunetara murriztu ahal izango baita.

24. artikulua.- Patronatua osatzea eta erabakiak hartzea.

1.- Patronatua balio osoz eraturik egongo da lehenengo deialdian, gutxienez kideen erdiak gehi bat agertzen direnean, bertan egonda edo ordezkari bidez.

2.- Aurreko paragrafoan adierazi den quoruma biltzen ez bada, Patronatua ordubete geroago elkartuko da. Bigarren bilera horretarako, berdina izango da zenbat kide azaltzen diren, betiere gutxienez hiru biltzen badira eta haien artean lehendakaria bada.

3.- Aurreko paragrafoetan adierazitakoa gorabehera, Patronatua deitu egin dela eta zilegi osatuta dagoela ulertuko da, kide guztiak bertan badaude, eta aho batez onartzen badute bilera egitea.

4.- Erabakiak botoen gehiengoz hartuko dira, honako kasu hauetakoren bat izan ezik:

a) Aldaketa,ategite, bereizketa eta azkentzeari buruzko erabakien kasuan, nahitaezkoa izango da Patronatuko kideen bi herenek aldeko botoa ematea.

b) Bestelako erabakietan, baldin eta horien inguruan baiezko botoen gehiengoa edo quoruma bestelakoa izan behar bada, Estatutu hauetan jasotakoaren arabera.

5.- Lehendakari diharduenaren botoak sor litezkeen berdinketak hautsiko ditu.

6.- Patronatu-kide bakoitzak, bilera bakoitzeko, beste patronatu-kide bati botoa eskuordetzeko aukera izango du, beti ere idatziz jasotzen bada.

7.- Idazkariak Patronatuaren bilera bakoitzaren akta egingo du, zeinean, bileraren tokiaz eta egunaz gain, bertaratu diren pertsonen izenak, eztabaidagaiak eta hartutako erabakien edukia jasoko baitira.

8.- Patronatua bideokonferentziaren edo beste komunikabide batzuen bidez bildu ahalko da, betiere hau guztia bermatzen bada: bertaratutakoen identifikazioa, komunikazioaren jarraitutasuna, eztabaidetan esku hartzeko aukera eta botoa emateko aukera. Horrela eginez gero, bilera lehendakaria dagoen lekuan egin dela ulertuko da.

9.- Salbuespen gisa, bilerarik egin gabe ere hartu ahal izango ditu erabakiak Patronatuak, betiere informazio- eta boto-eskubideak bermatuta badaude, botoa jaso dela nonbait agerrarazten bada eta haren benetakotasuna bermatzen bada. Erabakia pertsona juridikoaren helbidean hartu dela ulertuko da, eta emandako baliozko botoetatik azkena jasotako datan.

III. TITULUA.- ONDAREA ETA ARAUBIDE EKONOMIKOA

25. artikulua.- Fundazioaren ondarea.

Fundazioaren ondarea honako hauek osatuko dute: batetik, zuzkidura osatzen duten eta ekonomikoki balioets daitezkeen ondasunek, eskubideek eta obligazioek; eta, bestetik, eratu ondotik fundazioak lortutakoek –zuzkidurari lotu ala ez–.

26. artikulua.- Ondarezko zuzkidura.

1.- Fundazioaren hasierako ondarezko zuzkidura eratzeko eskritura publikoan jasotzen da, eta fundazioaren sortzaileak ekarritako ondasunek eta eskubideek osatzen dute.

2.- Ondorengo ondarezko zuzkidurak Patronatuak onartu beharko ditu, eta urteko kontuetan jaso behar dira.

3.- Fundazioak bere zuzkidura handitzera zuzendu behar ditu diru-sarreraren soberakinak.

27. artikulua.- Fundazioaren ondarea zaintzea.

1.- Fundazioaren ondarea zaindu eta babesteko, arau hauek bete beharko dira:

a) Fundazioaren ondarea osatzen duten ondasun eta eskubideak Fundazioaren izenean egon behar dira. Inbentarioan jaso beharko dira, eta, kasuan kasu, dagozkien erregistroetan inskribatuko beharko dira.

b) Ondasun higiezinak eta/edo benetako eskubideak Fundazioaren izenean inskribatuko dira, Jabetza-Erregistroan. Inskribatu daitezkeen gainerako ondasunak dagozkien erregistroetan inskribatuko dira.

c) Balioak eta esku-dirua, jabetza-tituluak, gordailu-ordezlagiriak eta jabaria, jabetza, erabilera, gozamina edo Fundazioaren titulartasunean dagoen beste edozein eskubide egiaztatzen duten beste edozein dokumentu Fundazioaren izenean gordeko dira, Patronatuak ezarritako erakundean.

d) Gainerako ondasun higigarriak Patronatuak zehazten duen eran gorde eta zainduko dira.

2.- Ondasun edo eskubide horiek guztiak Inbentario-Liburuan zehaztuko dira. Liburu hori Patronatuko idazkariaren ardurapean egongo da, eta bertan, haren ikuskaritzapean, haiek identifikatzeko eta deskribatzeko beharrezkoak diren inguruabar guztiak agertuko dira.

28. artikulua.- Ekonomia- eta kontabilitate-betebeharrak.

1.- Urteko kontuak onetsi eta hurrengo 30 egun naturaleko epearen barruan, Fundazioaren Patronatuak Euskal Autonomia Erkidegoko Fundazioen Erregistrora bidali beharko ditu urteko kontuak, behar bezala sinatuta, gordailu ditzaten. Kontuok irabazi asmorik gabeko erakundeetarako ezarritako kontabilitateari buruzko arauak bete beharko dituzte.

2.- Fundazioaren urteko kontuek elementu hauek jasoko dituzte gutxienez: balantzea, emaitzen kontua, memoria eta aurreko jarduera-planaren likidazioa. Orobat, Patronatuak kontu-ikuskaritzaren txostena aurkeztuko du, Euskal Autonomia Erkidegoko Fundazioen Legean aurreikusitako kasuetan.

3.- Halaber, kontuotan datu hauek guztiak jaso beharko dira: fundazioaren ondarezko, ekonomia eta finantza-egoera, urtean zehar egindako jarduerak eta ondarearen kudeaketa ekonomikoa, Fundazioaren helburuak eta lege arauak bete direla jakinarazi eta egiaztatzeko betiere.

4.- Ekitaldi ekonomikoa urtebetekoa izango da, eta urte naturalarekin bat egingo du.

Fundazioak Jarduera-Plan bat egingo du ekitaldi ekonomiko bakoitzeko, non diru-sarrerak eta gastuak adieraziko baititu orekaz. Aurrekontu hori Babesletzari aurkeztuko zaio, onartzen den urtearen azken hiruhilekoan, azalpen-memoriarekin batera.

29. artikulua.- Fundazioaren ondarea.

1.- Gutxienez emaitzen kontuaren diru-sarreraren % 70 baliatu beharko ditu Fundazioak bere helburuak gauzatzeko. Diru-sarrera horiek kontzeptu guztiak direla-eta lortuak izango dira, diru-sarrerak lortzeko fundazioak izandako gastuak kenduta, fundazioaren helburuak betetzeari buruzkoak izan ezik. Irabazi eta diru-sarrerak lortu direneko ekitaldiaren hasieratik hasi eta ekitaldi hori itxi ondoren hiru urte igaro arte izango da obligazio hori betetzeko epea.

2.- Administrazio-gastutzat joko dira fundazioaren ondarea osatzen duten ondasunen eta eskubideen administrazioak zuzenean eragindakoak, bai eta patronatuko kideek haien karguak betetzeagatik egindakoak ere, baldin eta diru hori itzulia izateko eskubiderik badute.

30. artikulua.- Ekonomia-, enpresa- edo merkataritza-jardueren garapena.

1.- Ekonomia-, enpresa- edo merkataritza-jarduerak egin ahal izango ditu Fundazioak, zuzenean nahiz beste erakunde batzuen bitartez, halako jarduerak fundazioaren helburuekin lotuta badaude edota jarduera horien osagarriak edo lagungarriak badira, eta betiere lehiaren defentsarako arauak men eginez.

2.- Gainera, beste erakunde batzuetan parte hartu ahal izango dute beste edozein ekonomia-jardueratan, sozietate-zorren gainean erantzukizun pertsonalik ez dagoen kasuetan.

31. artikulua.- Xedatze- eta zergapetze-egintzak.

1.- Euskal Autonomia Erkidegoko Fundazioen Babesletzari jakinarazi beharko dizkio Fundazioak beraren ondarea osatzen duten ondasunen edo eskubideen kostu bidezko edo doako xedatze-egintzak, baita kargatze-egintzak ere. Honako hauek, hain zuzen:

2.- Patronatuak erantzukizunpeko adierazpena aurkeztu beharko dio Babesletzari, non zehaztuko baita xedatzeko edo kargatzeko erabakia behar bezala hartu dela eta horretarako arrazoiak eta beharrak zein diren, orobat eragiketak fundazioari ez diola kalterik eragiten eta haren bideragarritasun ekonomikoa ere ez duela arriskuan jartzen.

3.- Xedatze- edo kargatze-egintzen xede diren ondasun edo eskubideek merkatuan duten balioa fundazioaren aktiboaren % 60 baino handiagoa bada; Patronatuak azterlan ekonomiko bat erantsi beharko dio erantzukizunpeko adierazpenari, profesional independente batek eginga. Adierazpenean azaldutakoa egia dela ziurtatu beharko du azterlanak, eta Fundazioaren bideragarritasun ekonomikoa bermatu beharko du, bai eta eragiketa irizpide ekonomiko-finantzarioekin eta merkatukoekin bat datorrela ere.

4.- Aipatutako xedatze- edo zergapetze-egintzak Euskal Autonomia Erkidegoko Fundazioen Erregistroan jasoko dira, edo beste edozein erregistroan inskribatuko dira, hala badagokio. Gainerako xedatze- edo zergapetze-egintzak Babesletzari urtero aurkeztu beharreko memorian jaso beharko dira.

IV. TITULUA.- ALDATZEA, BAT EGITEA, BEREIZTEA, AZKENTZEA ETA LIKIDATZEA.

32. artikulua.- Estatutuak aldatzea

1.- Fundazioaren Patronatuak estatutu hauek aldatzea sustatu dezake, fundazioaren helburuak hobeto betetzeko egokia bada betiere.

2.- Estatutuak aldatzeko erabakia arrazoitu egin beharko da; Patronatuko kideen bi herenen aldeko botoaz, gutxienez, hartu beharko da, eta Euskal Autonomia Erkidegoko Fundazioen Erregistroan inskribatu.

33. artikulua.- Azkentzea.

Fundazioa kasu hauetan azkenduko da:

- a) Eratu zenean finkatutako helburua erabat betetzen denean.
- b) Fundazioaren helburua betetzea ezinezkoa denean, Euskal Autonomia Erkidegoko Fundazioen Legean estatutuen aldaketari, fundazioen bat-egiteari eta bereizketari buruz xedatutakoa gora behera.
- d) Bategite-prozesu edo bereizketa-prozesu baten ondorioz hala gertatzen bada.
- e) Eratze-eskritura publikoan aurreikusitako arrazoiak gertatzen direnean.
- f) Legeek aurreikusitako beste edozein arrazoi gertatzen denean.

34. artikulua.- Azkentzeko prozedura.

1.- Aurreko artikuluko a) eta b) idatzi-zatietan adierazitakoa gertatuz gero, Fundazioa azkentzea Patronatuak erabaki beharko du eta Babesletzak berretsi. Patronatuaren erabakirik ez badago edota haren erabakia Babesletzak berresten ez badu, ebazpen judizial arrazoitua beharko da Fundazioa azkentzeko, Patronatuak edo/eta Babesletzak eskatuta, kasuen arabera.

3.- Aurreko artikuluko e) idatzi-zatian adierazitakoa gertatuz gero, ebazpen judizial arrazoitua eskatuko da.

4.- Fundazioa azkentzeko erabakia arrazoiu egin beharko da; Patronatuko kideen bi herenen aldeko botoaz, hartu beharko da, gutxienez.

Azkentzeko erabakia edo, hala badagokio, ebazpen judizial arrazoitua, Euskal Autonomia Erkidegoko Fundazioen Erregistroan inskribatuko da.

35. artikulua. Soberako ondarearen likidazioa eta erabilera.

Fundazioa azkentzen bada –haren jatorria bat-egite prozeduraren bat den kasuetan izan ezik– edo Fundazioa azkentzeko arrazoiak betetzen badira, likidazio-prozesuari ekingo zaio. Prozesu hori Patronatuak edo, Babesletzaren kontrolpean, gobernu-organo horrek izendatutako likidazio-batzorde batek eramango du aurrera, salbu eta, kasua hori bada, ebazpen judizial arrazoiu batek besterik ezartzen badu. Fundazioak bere nortasun juridikoa izaten jarraituko du prozesua amaitu arte, eta, epealdi horretan, «likidazioan» dagoen fundazio gisa identifikatu behar da.

Likidazioa egin eta gero geratzen diren ondasunak eta eskubideak nori esleitu Patronatuak erabakiko du askatasun osoz, ondare horren onuradun izendatuz interes orokorreko beste ekintza edo erakunde batzuk.

Aurreko zehaztapen hori falta bada, azkendutako fundazioaren helburuen antzekoak dituzten beste fundazio edo erakunde batzuetara bideratuko ditu Babesletzak ondasun eta eskubideak, eta, lehentasunez, beren helbidea udalerrri berean edo, han izan ezean, lurralde historiko berean dutenetara.

V. TITULUA.- BABESLETZA ETA FUNDAZIOEN ERREGISTROA

36. artikulua- Euskal Autonomia Erkidegoko Fundazioen Erregistroa.

Fundazio honen eraketa Euskal Autonomia Erkidegoko Fundazioen Erregistroan inskribatuko da, bai eta haren egintza edo negozio juridiko guztiak ere, legearen arabera hala egin behar badute.

37. artikulua.- Euskal Autonomia Erkidegoko Fundazioen Babesletza.

Fundazio hau Euskal Autonomia Erkidegoko Fundazioen Babesletzaren zaintzapean, aholkularitzapean eta kontrolpean egongo da, indarrean dauden legeetan ezarritakoaren arabera.

38. artikulua. Zehapen-araubidea.

Fundazioak Euskal Autonomia Erkidegoko Fundazioen Legean ezarritako zehazpen-araubidea bete behar du.

A handwritten signature in blue ink, consisting of a large, stylized 'H' or 'M' shape with a circular loop and a long vertical stroke extending downwards.